

Antifone di jentrade Sal 105,47

Salvinus, Signôr nestri Diu,
e tirinus dongje di framieç dai popui,
par che al to non sant o podin dâi laude
e cu la tô laude ricreâsi.

Colete

Signôr nestri Diu,
danus di adorâti cun dut il cûr,
e di volêur ben a ducj i umign cul amôr ch' al covente.
Pal nestri Signôr Gjesù Crist to Fi, ch' al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Dt 18,15-20

O fasarai vignî fûr un profete e o metarai lis mês peraulis su la sô bocje.

Dal libri dal Deuteronomi

Mosè al fevelà al popul disint: «Il Signôr to Diu al fasarà vignî fûr par te, framieç di te, fra i tiei fradis, un profete compagn di me che i larês daûrji. Al è ce che tu i âs domandât al Signôr to Diu sul Oreb, te di de cunvigne: Par no murî, no scoltarai mai altri la vôs dal Signôr gno Diu e no cjararai plui chest fûc tant grant. Il Signôr mi à rispuindût: A an fevelât ben. Ur fasarai vignî fûr, framieç dai lôr fradis, un profete compagn di te, o metarai lis mês peraulis su la sô bocje e ur disarà dut ce che i ordenarai. Se un nol scolte lis mês peraulis, che chest profete lis varà ditis a non gno, i domandarai cont jo in persone a di chest om. Se però un profete al à il fiât di dî a non gno une sole peraule che no i ai dât ordin di dîle, e s' al fevele a non di altris dius, chest profete al murarà».
Peraule di Diu.

SALM RESPONSORIÂL dal Salm 94

R. Fâs che o scoltîn, Signôr, la tô vôs.

Vignît, batîn lis mans al Signôr,
fasîn fieste a la crete che nus pare;
presentînsi denant di lui ringraziantlu. **R.**

Vignît, butînsi a schene plete
denant dal Signôr che nus à creâts,
parcè che al è lui il nestri Diu,
e nô, il popul che lui al passone,
il trop de sô malghe. **R.**

Joi, se vuê la sô vôs o scoltassis:
«No stait a inrochîsi tal vuestri cûr come a Meribe,
come tal desert te di di Masse,
là che mi an tirât a ciment i vuestris paris,
a an volût provâmi,
ancje se a vevin viodudis lis mês voris». **R.**

SECONDE LETURE 1 Cor 7,32-35

La virgjine e à pinsîr pes robis dal Signôr, par jessi sante.
De prime letare di san Pauli apuestul ai Corints

Fradis, jo o varès gust di viodius cence fastidis. Chel che nol è sposât al à pinsîr pes robis dal Signôr, cemût fâ content il Signôr;chel ch'al è sposât invezit al à pinsîr pes robis dal mont, cemût fâ contente la femine, e si cjate dividût. Cussì ancje la femine no maridade o la virgine e à pinsîr pes robis dal Signôr, par jessi sante tal cuarp e tal spirt; la maridade invezit e à pinsîr pes robis dal mont, cemût fâ content il so om. Chest us al dîs pal vuestri ben, no par tindius un laç, ma par indreçâus viers di ce che al merte e al mene a stâ cul Signôr cence distrazions.
Peraule di Diu.

CJANT AL VANZELI Lc 7,16

R. Aleluia, aleluia.

Un grant profete al è comparît framieç di nô:
Diu al è vignût a viodi dal so popul.

R. Aleluia.

VANZELI Mc 1,21-28

Al inscuelave come un ch'al à autoritât.

Dal vanzeli seont Marc

A Cafarnao, jentrât in di di sabide te sinagoghe, Gjesù al tacà a insegnâ. E ducj a restavin dal so insegnament, parcè che ju inscuelave come un ch'al à autoritât e no come i scrituriscj.

Inte lôr sinagoghe al jere un om paronât di un spirt soç, che si metè a berghelâ disint: «Ce esal fra nô e te, Gjesù Nazaren? Sêstu vignût a ruvinânus? Jo o sai cui che tu sês: il sant di Diu!». Ma Gjesù i cridà disint: «Tâs e salte fûr di lui!». Alore il spirt soç lu sdrondenà di copâlu, po al petà un grant berli e al saltà fûr di lui. A cjaparin ducj une grande pôre, che di fat si domandavin un cul altri: «Po cui esal chel chi? Une dutrine gnove, insegnade cun autoritât. Ur comande fintremai ai spirts soçs e lôr i ubidissin». E cussì il so non si slargjà di ogni bande, par dute la region de Galilee.

Peraule dal Signôr.

Su lis ufiertis

O metìn sui tiei altârs, Signôr,
i regâi de nestre suditançe;
acetiju di bon voli
e fasiu diventâ il sacrament de nestre redençe.
Par Crist nestri Signôr.

Antifone a la comunion Sal 30,17-18

Fâs lusî la tô muse sul to famei,
salvimi pal to boncûr.
Signôr, che no vedi di restâ deludût
cun tant che ti ai clamât.

O ben: Mt 5,3.5

Furtunâts i puars tal spirt,
parcè che il ream dai cîi al è lôr.
Furtunâts chei ch'a son bogns di cûr,
parcè che a ereditaran la tiere.

Daspò de comunion

Rinfuartîts cul sacrament de nestre redençe, ti preìn, Signôr,
che chest jutori de salvece eterne
nus fasi cressi inte vere fede.
Par Crist nestri Signôr.

